

## Салла

05:00 / 09.01.2017 5545

Амр ибн ҳурайс розияллоҳу анҳудан ривоят қилинади:

**«Набий соллаллоҳу алайҳи васалламни минбарда турғанларини күрдим. Бошларида қора салла, унинг пешини кифтлари орасига тушириб олган эдилар».**

Бешовларидан фақат Бухорий ривоят қилмаган.

Шарҳ: Аввало, ҳадиснинг ровийи Амр ибн ҳурайс розияллоҳу анҳу билан яқиндан танишиб олайлик:

Амр ибн ҳурайс ибн Амр ибн Усмон Маҳзумий ал-Қураший (620-704 милодий саналар), куниялари Абу Сайд ҳижратдан 2 йил олдин таваллуд топдилар.

Бадр йилида оналари Расулуллоҳ соллаллоҳу алайҳи васалламнинг хузурларига олиб келгандаридан Расулуллоҳ соллаллоҳу алайҳи васаллам унинг бошини силаб, барака тилаб дуо қилдилар. ҳа-қиқатан ҳам у киши ҳаётларидан кўп молларни қўлга киритдилар, Куфа аҳлиниңг бойларидан бири бўлдилар.

Бу зот Қодисия жангига иштирок этдилар. Куфадаги Бани Умайя қабиласини бошлиқларидан эдилар.

Расулуллоҳдан 18 та ҳадис ривоят қилдилар. Абу Бакр, Умар, Али, Ибн Масъуд ва бошқалардан ҳам ривоят қилдилар. Бу кишидан ўғиллари Жаъфар ва Куфа аҳлидан бўлган кишилар ривоят қилишди. Бу киши тўплаган ҳадислардан баъзиларини уч «Саҳиҳ» соҳиблари ўз китобларига киритишган.

Бу зот ҳижратни 85 йили Куфада вафот этдилар.

ҳадисда Набий соллаллоҳу алайҳи васаллам салла ўраб, унинг бир учини орқаларига ташлаб юришлари баён қилинмоқда.

Салланинг қора рангда бўлиши эса, шарт эмас. Амр ибн ҳурайс розияллоҳу анҳу кўрганларидан Набий соллаллоҳу алайҳи васаллам иттифоқо шундоқ рангда салла ўраган эканлар. Бошқа ранглар ҳам бўлади. Оқ ранг афзал экани ҳақида ривоятлар бор.

Ибн Умар розияллоху анҳудан ривоят:

**«Набий соллаллоҳу алайҳи васаллам қачон салла ўрасалар, пешини кифтлари орасидан тушириб олар эдилар. Нофеъ айтадики:**

**«Ибн Умар ҳам салласининг пешини кифтлари орасига тушириб юрар эди».**

Термизий ривоят қилган.

Шарҳ: Бу ҳадис ҳам олдингисини тасдиқлайди ва ҳамда умматнинг Набий соллаллоҳу алайҳи васалламга бу ишда иқтидо қилиш кераклигини таъкидлайди.

Жобир розияллоху анҳудан ривоят қилинади:

**«Набий соллаллоҳу алайҳи васаллам:**

**«Салла билан ўқилган икки ракат намоз салласиз ўқилган етмиш ракат намоздан яхшидир» дедилар».**

Дайламий ривоят қилган.

Шарҳ: Демак, салла намознинг савоби етмиш баробар кўпайишига сабаб бўлади. Набий соллаллоҳу алайҳи васалламнинг суннатлари Жаброил алайҳиссалом ҳам Набий соллаллоҳу алайҳи васалламнинг ҳузурларига салла ўраб тушганлари ҳақида ривоятлар бор.